

Piujuartitsineq tunngavigalugu aalisarneq pillugu politikki

Imartani aalisakkat assigiinngisitaartuunerisa eriagineqarnissaat qulakkeerumallugu akisussaassulimmik aamma piujuartitsineq tunngavigalugu tamatigut aalisartoqartarnissaa Royal Greenlandimit pingaartinneqarpoq. Tamatumani aalisarnerit nammineq akisussaaffigisavut, najukkani tunisassiorfiutitsinnut tulaassassanik aalisarnerit toqqaannanngitsumik sunniuteqarfigisavut taamatuttaaq aalisakkat suliffeqarfiup avataani pisiortukkat pineqarput.

Nassuiaat

Uumassusilerisut innersuussutaat naapertorlugit aalisagartassat annertunerpaaffissalikkat tunngavigalugit aalisagartat pissuseqatigiiaat assigiinngitsut aarlerinartorsiortitaanngikkaangata piujuartitsineq tunngavigalugu aalisarneqarsimasutut Royal Greenlandimit isigineqartarput. Taamatuttaaq aalisarnerni immap naqqanik innarliisoqarsimassanngilaq, saniatigut pisat minnerpaaffissaminiitinneqarsimasuussapput igitsisoqarsimasassananilu. Kiisalu aalisarnerit sapinngisamik pitsaanerpaamik aqunneqarlutillu nakkutigineqarsimasuussapput.

Aalisarneq pingajuusutut inissisimasunit piujuartitsineq tunngavigalugu aalisarnertut akuerisaanngikkaluartoq piujuartitsinermik aallaaveqarsinnaanera miserratinngilarput, taamaakkaluartoq pingajuusutut inissisimasut akuersissutaat aalisarnerup piujuartitsinermik tunngaveqarneranut qulakkeerisuunerpaajusartutut isigaarput. Aalisarneq piujuartitsinermik tunngaveqaraangat MSC-mit akuerisaasarpoq.

Suleqatigisat

Royal Greenlandi ingammik Kalaallit Nunaanni inuussutissarsiornermik aallussalinnik, aalisartunik, ilisimatusartunik oqartussaasunillu suleqateqarluartuummat piujuartitsineq tunngavigalugu aalisarnermik ineriartortitsinermi suleqataarusullunilu ilisimasanik avitseqateqarusuppoq. Tamanna Kalaallit Nunaanni suliffeqarfiit aalisarnermik tunisassiornermillu aallussallit soqutigisaqatigiiffiata - Sustainable Fisheries Greenlandip (SFG) Kalaallit Nunaanni aalisarnerit MSC-mit akuerisaanissaannut sulissuteqartartup suleqatigineratigut qulakkiissavarput.

Royal Greenlandip avataani aalisarnera

Royal Greenlandip kilisaataatai ingammik Kalaallit Nunaata imartaani aammali Barentsip imartaani aalisartarput. Aalisarnermut piumasaqaatit ineriartornerannut malinnaanissatsinnut, uumassusilerisut aalisagaqassutsit tunngavigalugit aalisagartassanik innersuussutiminnik allannguinerisa qisuarfigisarnissaannut taamatuttaaq atortut nutaaliat atorlugit aalisarnermik ineriartortitseqataanissatsinnut pisussaaffeqarluta isumaqarpugut.

Avataani aalisarnermut tunngatillugu anguniakkat makkuupput:

- Avataani aalisarnerit MSC-mit akuerineqassasut
- Immap ataqatigiinnera tunngavigalugu aalisarnermik ingerlatsisoqarnissaanut tapersersuineq

Royal Greenlandip sinerissap qanittuani aalisarnera aalisakkallu najukkani aalisartunit tunisat

Aalisariutit mikinerit umiatsiaaqqallu sinerissami illoqarfiit nunaqarfiillu eqqaanni aalisassutigineqartarput, aalisariutillu ikittuinnaat Royal Greenlandimit pigineqarput.

Inatsisit naapertorlugit Royal Greenlandi aalisarnermik aallussisut allat assigalugit Kalaallit Nunaanni aalisagartani saniatigullu pisani tamaasa pillugit oqartussaasunut

nalunaaruteqarnissaminut pisussaaffeqarpoq. Tamanna aalisagartanik nalunaarsuisoqartarneranut avatangiisillu sunnerneqartarnerannut tunngatillugu pingaaruteqarlunilu aalisarnerit MSC-mit akuerisaanissaannut tunngaviuvoq.

Sinerissap qanittuani aalisarnermut tunngatillugu anguniakkat makkuupput:

- Aalisakkat sinerissap qanittuani aalisarneqarnerpaat tamarmik MSC-mit akuerineqarnissaat
- Aalisakkanut aarlerinartorsiortitaasunut imaluunniit paasissutissanik katersinermut tunngasutigut aalisarnerit pitsanngorsarnissaannut suliniutinik aallartitsisoqarnissaa
- Aalisakkat ilisimasaat tunngavigalugit aalisarnermik ineriartortitsisoqarnissaa
- Aalisagartanik saniatigullu pisanik pisariinnerusumik nalunaarsueriaaseqalersitsisoqarnissaa

Imartat ataqatigiinnerannik aalisagaqarfinnillu eriaginninneq

Immami uumassusillit aarlerinartorsiortinneqannginnissaannut ataavartumik ineriartortitsinerup annertusineqarnissaa taamatuttaaq saniatigut pisat igitallu annikinnerpaaffissaaniitinnissaat anguniarlugu naleqqussarluinnakkanik atortoqarluta aalisartarpugut. Imartat ataqatigiinnerannut aalisagaqarfinnillu sapinngisamik pitsaanerpaamik eriaginikkusuppugut, aalisagaqarfiillu mianerisassaasorineqarpata oqartussaasunut ilisimatusartunullu nalunaarutigineqartassapput.

Suliffeqrfiup avataani pisiortorneq

Aalisakkanik qalerualinnillu suliffeqarfiup avataani pisiortornitsinni tunisassiassanik nioqqutissanillu naammasseriikkanik piujuartitsinermik tunngavilinnik pisiortornissarput ukkatarisarpaput, taamatuttaaq pissuseqatigiiaanik aalisarnernillu piujuartitsineq tunngavigalugu aalisarneq pillugu politikkimut uunga naapertuutinngitsunik pisiortortarnatalu aallussaartanngilagut.

Kingumut paasissutissat IUU-lu

Royal Greenlandi aalisakkanik qalerualinnillu ingammik Atlantikup Avannaata imartaaneersunik aammali imartanit allaneersunik aalisarlunilu tukertitsivinneersunik pisiortortarpoq. Tunisassiat sumi pisarineqarsimanerannut il.il. paasissutissanik pisisartumut ingerlatitseqqiisinnaajumalluni aammali aalisarnerit piujuartitsinermik tunngaveqarneri uppersarsinnaajumallugit aalisarnerit pisiortornerillu pillugit kingumut paasissutissanik peqarnissarput pingaaruteqarpoq.


Aalisarnivut inatsisinik unioqqutitsisumik, nalunaarsorneqanngitsumik killilersugaanngitsumilluunniit (IUU) ingerlanneqartanngitsut kingumut paasissutissaativut najoqqutaralugit uppersarsinnaallugulu qulakkeersinnaasarpaput.

Pissuseqatigiiaat nutaat misileraallunilu aalisarneq

Pissuseqatigiiaat aallussavut silap pissusaata allanngoriartornerata ilutigisaanik nutaartaqarsinnaasarpaput. Najukkani innuttasunut akuuffigisatsinnut iluaqutaasumik immami uumassusillit aarlerinartorsiortinneqannginnissaannut ataavartumik ineriartortitsinitsinnik attassinissarput anguniarlugu pilersaarusiornikkut suliniuteqarnitsigut misileraalluni aalisarnermik tukertitsiveqarnermilluunniit aallusserusuppugut.

Piujuartitsineq tunngavigalugu aalisarneq pillugu politikki Royal Greenlandimut tamarmut atuuppoq.

Nuuk, ulloq 4. juuli 2019



CEO Mikael Thinghuus



CFO Nils Duus Kinnerup



VP Production Lars Nielsen



VP Sale Bruno Olesen